

16

T 3210/1432.83

CHINESE - JAPANESE LIBRARY
HARVARD - YENCHING INSTITUTE
87 HARVARD UNIVERSITY
JAN 10 1941

屈天成張志叅學宮碑記字培齋號禹功

臨在佛大學漢和
書館選珍藏印

劾用河塹以省親歸生平慷慨好義勇于為善歲丙子邑中

大饑出穀千石平糶日為粥于路以食餓者病則濟之以藥

全活甚眾嘗與兄大成共置義冢田十餘畝歲施棺若干自

邑治至新倉鎮建石梁十有八學宮圯獨任葺治復捐田二

十餘畝為歲修資遇族眾困乏及孤嫠者按節周卹之邑稱

仁人君子皆以天成為首以子樹榮貴贈刑部員外

沈瑜高志叅育嬰堂志字倬宸生員家不甚饒周急濟困篤

行不倦邑中育嬰始于知縣董天眷然庶事草創經制未備

歲所收遺嬰皆送蘇州就育至是瑜慨然以實心奉行為已

任借同志朱弓錫周維翰過鰲三人請于當事設法勸捐里人感其誠爭相樂輸瑜鈎較出入苦心擘畫十六載規制詳備堂產幾二百畝活嬰無筭瑜亦以勞瘁卒朱弓錫字彤一周維翰字翼皇皆監生過鰲字奕昭生員

張逢年張志叅育嬰堂志字炳文號怡亭監生候選知府性好義宗祠圯獨任葺治雍正丁未主育嬰堂事以其地偏窄捐資創建一堂復捐屋租為歲修資及堂中催乳費至今賴之著有懷永堂詩存二卷

韓廷芳張志纂字遇宸生員性剛方正直初成婚妻有宿疾母欲為置妾固辭琴瑟靜好終身不貳色好獎人善人有過

必忠告遇橫逆不校歲大饑廷芳向邑令陳民疾苦得省刑緩徵晚借楊之淳馮朝棟等舉同善會開誠勸捐設法賑濟孤嫠廢疾至今賴之

馮朝棟張志纂字觀王邑庠生性孝友力行善事析箸後兄殖中落割己產膳兄與韓廷芳創舉同善會事見韓傳尋又

與馬啓後收埋無主棺骸歲以為常

按二人沒有俗生方文達繼為之躬親收瘞數

年竟以勞瘁卒

又集同人為放生會課徒修脯悉惠貧乏家無斗筲

晏如也東身圭璧里黨咸欽年四十六卒

隱逸

按前史隱逸傳必遜世無悶之士方為載入非不遇時者可假託也今擇其尤者錄之清風亮節落

落數人足以起頑式懦矣

宋

殷澄嘉興府圖記字公源華亭人家富好施每大雨雪載薪米救寒餒又置棺櫓濟人人日為殷佛子性介特生平無宿諾見義勇為元兵壓境澄猶保聚未下元將楊掃地者大怒命屠其境澄伏劍扣軍門曰民猶水也水順則流逆則激民順則從逆則亂今將軍不廣好生之德施不殺之威顧欲盡勦斯民乎楊怒欲劍斬澄澄厲聲曰即殺一人活千萬人死安足惜辭氣益壯楊感悟一境獲全丞相伯顏聞而義之授澄軍民都總管使守其地澄曰大宋之亡吾以親故不與俱亡乃獨不能逸乎遂野服放浪九峰三泖自稱泖南浪翁

宋志

時嘉興有趙孟備陶菊隱亦以宋亡矢節稱秀州三義

元

陸正海鹽文獻志叅朱志字行正本名唐輔端毅寡言讀書

一覽終身不忘旁通律呂象數之學以家世宋臣絕意仕進

元世祖平一字內遣治書侍御史程文海至江南訪求賢士

正稱疾不見文海還以正與張伯淳薦正獨不起後復與劉

因同徵不赴隱居陳山教授生徒常數百人其教法類胡翼

之而尤以慎獨存心為要凡及門學徒與家之子弟僮僕見

人皆恭默下視人望而知為陸先生家出也所著有七經補

注樂律考正學編克己雜言凡八十餘卷卒年六十七學者

諡為靖獻先生弟唐俊亦以學行稱子應奇字景祥明初郡守劉澤民知其賢欲奏官之力辭孫士賢字彥良樂善好文有意氣元末名士會稽楊維禎宣城貢師泰錢塘陳彥博多主其家

明

沈維鏞張志字宜卿號小山十齡能詩文二十領嘉靖戊子鄉薦性狷介不因人熱試禮闈姻戚趙文華陸炳交為之地維鏞知之即托病歸終身不上公車又屬銓曹授以甲科官亦不就人呼為癡舉人侍御劉存義嘗曰我蒞平湖四閱寒暑不為私謁者惟沈小山一人晚益放曠花晨月夕與騷人

韻七詩酒倡酬流連忘倦一日偕其戚陸某泛舟東湖陸極口羨東湖滋息維鏞默不語酒未闌遣蒼頭取券至交陸曰吾以君為雅人故偕君放眼九派湖光君乃以為利藪耶今割畀君余亦與俗子絕交矣其骯髒負氣類如此

陸光宙樵李詩繫字與常號巨石晚稱頑石老人刑部司務棐子四歲而孤邁家難匿車中走京師至武惠所年十六補順天弟子員聞母訃南還隱居郊園晚年超絕世好與宋初賜璩君瑕諸名輩友善按張志時與初賜輩一十八人結文酒社嘗泛震澤一白

衣叟執紅梅造舟光宙曰必佳客也載與酣飲作紅梅詩以別曾過嘉善觀幽瀾泉寺僧不為禮乃題一詩於壁既去有

一顯者見詩追跡之不得其託寄高曠若此晚夢一道士持
 靖節小像索題諦視之即已也題曰在晉為淵明躬耕辭五
 斗昔以節自持今惟義自守千載復歸來春風吹五柳曾識
 白蓮人遠公是吾友蓋十八人中有白蓮道人如本也翼日
 遂逝年八十六著有鋤餘集嘉興府吳志子公鏐字芳淑有
 志行學者稱蒿庵先生

李天植嘉興府吳志叅乍浦志字因仲崇禎癸酉舉人工詩
 歌古文辭屏迹不一干有司築蜃園與海內名流嘯咏其間
 癸未應會試抵鎮江登金焦北固諸山倘然有感遂易名確
 字潛初遠返遜居龍湫山不入城市自署龍湫山人往往糧

絕不給或遺之粟非其人寧飢勿受一子早喪

子名觀字我生弱冠遊庠

惟白頭婦相對問績棕鞋俟天目僧至償其直易去又劈竹

為器鬻於人往來海涯九峰間後復耳聾與人接每于粉板

作書通酬答長吏守帥聞其名訪之輒踰垣避終不見山中

有鄭嬰垣者窮老無妻孥孤介絕俗至凍死雪中與天植為

至交寧都魏叔子禧千里見訪臨別各揮涕禧因屬秀水曹

侍郎溶且致書周青士質為天植代謀朝夕天植終堅謝之

魏禧與周青士書禧白青士足下僕前同沈進之往乍浦觀
 海中日出遂因周雲球交李潛夫先生潛夫名天植崇正癸
 酉登賢書今年八十一矣甲申乙酉以來禿頂披緇衣二十
 七年不見人家奇貧無子又病疝氣不能二三百步行久坐
 下墜嘗日仰臥讀書門無三尺之童厨無爨婢獨老妻在室
 頽然相對無所得食亦已明矣方僕往見自盤跚執盃茗不

能具飯飯客雲球移酒一壺四簋一盂飯來就得竟兩三時
 坐潛夫耳聾於粉版作教使客以墨筆書所言相酬答語僕
 云身僻處海濱無知識天下賢豪因問比交遊得幾何人僕
 乃疏先後諸君子姓氏版上及自道出處潛夫輒視予而泣
 又出所著作令僕觀覽嗟乎古書傳所稱高士以苦節為可
 貞吾黨讀書恨不生與同時得解推衣食為榮幸今親見斯
 人飢餓瀕死亡無以相救恤則亦傷已家居常應人索書僅
 有筆二枝墨寸餘皆苦惡不堪用僕檢篋中得二枝筆已磨
 墨一片貽之奉銀五錢暫具十日食潛夫五反僕曰是非盜
 蹠樹也然後受臨別相拜灑涕潛夫尤哀曰子還山吾終古
 不復見子也矣僕出門惆悵頻頻回首望之門闔然後去既
 念潛夫老病死且暮事耳決不得殯葬僕隔四千里今又無
 能贈乃以屬倦圃曹先生先生曰諾而屬進之於雲球處候
 平安抑古人有言椎牛而祭不如雞豚之逮親存此豈獨人
 子情然哉戚屬朋友皆然謀其死不若先謀其生也頃酒間
 語及曹先生暨足下慨然作悲敬欲聯數同志為扶月供使
 高士夫婦不轉溝壑僕直下感激如俄得飽明日僕之靈巖
 候繼公病便往造徐昭法恩息刺舟未竟斯緒伏念貧士中
 負古誼不憚勞苦求請以益于人者非足下誰屬僕重足下
 非特以能詩古文已願足下力肩曹先生首倡率必多應者

費度每月米五斗銀五錢人占一月周乃復始力不瞻者或
 月二一人占之俟其考終則應一月者出銀一兩斲木壘土
 便足供殯葬自古高人志士人之所仰天心所愛惜而彼方
 困躓飢寒不能自聊非必命數適然又非才力拙不足自養
 波蓋有所不為擇而蹈之以至是然必欲護惜安全之者則
 又天之心人情所不可解也悲夫潛夫先生身為孝廉三十
 九年使肯挾其才于當世何必不富貴肯妄求取豈無故舊
 仕宦足給其欲亦何至貧困如此老且死而不悔也雲球與
 潛夫望衡而居乍浦去平湖不三十里士君子必知潛夫當
 有同斯謀者足下幸鈔此書一通託進之寄雲球僕不及更
 作潛夫古之難衣食者然吾輩設誠將以禮敬亦有可受之
 道辛亥九月日太湖舟中禧拜白自注余訪徐昭法山中索
 示近作見此書昭法曰君意良厚恐李先生不食他食君子
 愛人以德君力所不及聽其餓死可也頃沈進之來云周雲
 球致予此意李先生堅謝之而先生亦於今二月棄人
 間矣予且痛且愧真淺之為丈夫也王子七月自記
 年八
 十二豫知死日賦詩偃卧乃卒鄉人私謚介節先生崇祀鄉
 賢著有蜃園集九山志九山游草忘機社月令詩送秋詩梅

花百詠諸刻其未刊者有蜃園文集十卷古今觴咏集八卷

山房日錄四十卷隱林列傳十卷明隱林忠清合傳四卷表

忠錄灌園錄紀夢集山居雜志山居雜咏清修八則呼天外

史大東飽蝨篇深省堂詩話若干卷按未刊諸書見里人宋景濂龍湫集序考天植

詩始稱放言集繼稱就正草泊陸亦樵為之鏤版羊城更名

曰蜃園前後集暮年所著別為續集一卷今皆散佚宋景濂

為收拾殘編得詩四卷文嗣子耀字明也號果菴自稱晚杏

一卷雜著一卷名龍湫集園主人性愛山水有徧遊五嶽之志晚年于燕于楚于江都

歸卒年七十有五從子為光字宛星號蔗邨增廣生山人既

歿耀相繼殂謝遺稿散軼賴為光搜輯成編得不廢墜性喜

吟咏兼善駢體晚歲潦倒益甚鬱鬱以死年六十有七著有

九山續志沈中琛冬初訪龍湫李潛夫詩一別雲山又幾秋情深還續雪堂遊松濤不減樵夫聽石枕多因處

士留身歷飄搖同患難路經僻絕轉清幽相逢未盡相知語乘興歸來月滿舟陸奎勳題潛夫遺像詩海上行歌作隱淪

從渠淺水幾揚塵九山卓立青如舊苦憶風流折角巾老妻白髮能偕隱太息無兒慰暮年不是故交王陸在蜃園遺草

烟散秋馬嘉植朱志字允和號和衷給事中嘉植仲弟崇禎己卯舉

人孤高絕俗時就里塾課生徒東脯所入悉以供親嘗云兄

以祿養我以館穀養各供子職焉後寄跡蘭若不入城市往

武林法華山受戒同年友嚴沆物色之莫能得書畫各臻其

妙詩文甚富易簣時悉取焚之曰毋留文字以衒名無子遺

命不立嗣弟嘉相儒雅自命無貴介氣晚年不應試翛然終

隱柘上遺詩嘉楨既習禪觀持戒律凡持羹滌器必躬爲之苦行不倦自號宗賢法名宏任

過銘篋朱志字叔寅府丞庭訓子生而穎悟年十九中萬歷戊午副榜庚午下第黃太史石齋物色之深以有司失人爲恨乙酉避兵紫梅山又二年值歲薦不就輒焚去制菘稿杜門謝客冢宰陳百史以書幣迎峻却之靜坐讀書雖餽粥不給怡怡無戚容甲子春感微疾召諸孫曰我一生閱歷皆是我分內事非爲名高也言訖而逝年八十六所著有性道筌朱陸解環蠹魚稿藏于家子澤廣邑庠生性醇而介無褻展氣早世不遇士林惜之

國朝

楊九垓構李詩繫叅張志字孚九邑生少有志節弱冠好讀史論天下形勢如指掌所交皆四方賢士大夫崇禎季年屢欲詣闕上書其母怒曰我習爾家皆各循階級以保門戶汝固才奈何作意外舉止九垓感母言遂絕口不談時務然性磊落如故馬阮擅權九垓獨入孝陵慟哭既歸里中醉輒擲冠于地曰楊大一男子爲爾所誤投之廁中始快耳素伉直好呵罵一世勿顧衆刃之將刺其背也嘗手錄廿一史類纂三百餘卷工書畫求者必韻人佳客以餽酒爲辭則大喜出之俗子十返弗顧也家貧無子丁巳疾作高詠縱橫計不就慷慨志猶存二語而歿年八十

沈岸登嘉興府吳志纂字覃九號南淳一字黑蝶布衣性恬淡短褐蔬食屢空晏如耽泉石不求聞達有文衡山沈石田之風侍郎高士奇聞其名延為子輿師無一私語于士奇士奇嘗敬憚之生平著述半在遊屐詩詞皆雋妙寫山水蘭石瀟灑淡遠無塵俗氣書宗二王時稱三絕鐵筆亦工著有黑蝶齋詩鈔四卷黑蝶詞一卷行世韻鈔春秋紀異若干卷未刊陸奎勳挽南淳詩倚風清淚落潺湲天路高高豹守關直是織心成痼疾何曾漱石得餘閑漸窮已悔詩名盛垂老方辭客况艱碑頌即關千古事不如生與買青山

楊之淳張志字甘山御史燬曾孫績學砥行介然不苟風矩端凝動必由禮衣必布食不擇味讀書雖盛暑必整衣冠湛

深易理每語人曰屋漏有鬼神才短亦非恥居南郭孤樓岌然供祖先神主每日焚香肅拜親歿茹素終身家貧授徒餬口舉一子殤鼓盆後不再娶生平不貳色不殺生晚年焚所著書自題其像曰輟耕圖張誠題之淳輟耕遺像詩家風稟四知史傳推獨行誰識輟耕心穆然懷賢聖

行詣按前志文苑孝友尚義各門多雜列錯敘不能專推所重未免遊騎無歸今擇其兼有眾長非專門可定及舊傳涉套無從考核重纂者

槩列行詣門亦仕宦者列傳之意

宋

陸能仁朱志宋咸淳進士以伯顏兵亂與族父霆龍隱居靈溪今其地有陸高士墓子孫遂為平湖人

元

沈文俊朱志叅張志字清遠湖州馬要鄉人族雄於貲元季有司以濟國上聞舉族被繫其貧者逸居四方文俊遷於海鹽之清溪析縣後登第者自其裔孫琮瑋始先是劉基館其家值張樂召客察鼓中有泣聲因辭去文俊遂扁舟遁至清溪居焉越三日難作

趙友聞程志叅朱志字心古宋太宗十三世孫元至大間隱居新倉鎮學古養高多識好義有聲於時郡邑以提舉薦固辭不就明洪武四年特旌善良給戶帖曰友一

明

沈渭朱志字可閒父吳與弟昇友愛昇二子琮瑋從同郡沈稽勲淳學酬以產渭出已產相佐治奩嫁諸姑暨妹無間嫡庶皆先父意為之父嘗北遊固請侍行年幾六十絕去家事以閒曠終其身以子棨封工部主事

馬昇程志博綜典籍有經世志聞靖難兵起遂隱居以父遺田宅讓諸弟別築一稼詩文自娛課子晬曉俱成名曉為御史昇竹椽布袍如故自號溪南老隱著溪南集蒹葭詩稿

周衢分省人物考字士亨性樸雅弗事華靡時邑新創人文未著衢篤學慕古領景泰庚午鄉薦任山東膠州學正以禮率人訓迪無倦諸生有衣食不給無力喪葬者出俸助之罷

歸肆力經史為身心性命之學所著詩文力追古人

俞爨明詩綜字廷貴有行誼宏治間邑令熊卓引與計事行

之民輒曰神明或干以私遂謝弗與通里人諺曰郭東俞生

當春握冰

沈樟程志字元美號西谿穎悟絕倫少受易日誦千百言弱

冠為諸生試輒高等困浙闈遂入太學復不售選授南直蘇

州經歷不赴歸別構數椽為終隱計尤喜長嘯竹下自號竹

隱與二三知己商略詩史遇佳辰則飛觴浩歌未嘗不醉醉

亦無狂態

趙彰朱志字用常號梧岡宋宗室與詔後宏治辛酉貢士負

竒嗜古藏書數萬卷王太史梅徵時館於彰已而入中秘每

言吾所學大半得之用常家也及入太學薛吏部故與彰善

曰子盍俛就廣文我為子地三年可得令彰謝曰敝廬薄田

足供伏臘竒書野乘不乏披吟安能為五斗折腰向白眼少

年耶不試而歸曾孫維寰有傳

沈溱朱志字惠水號東洲其祖自武康分派僑居東泖至溱

始遷邑之石莊為人倜儻多才重然諾喜結客明正德間為

文思院大使以事忤劉瑾被杖下獄欲置之死有韓松隣者

與溱善走泣于項襄毅屠康僖得釋瑾恨未平將復杖之松

隣流涕曰沈公繫獄數月再杖必不起我不忍良友榜捶死

也請以身代會瑾竟不問乃歸隱未幾卒子孫遂爲湖人
楊陞程志字敏夫諸生嘉靖間倭警祖母與母倉皇走匿陞
咫尺不離父歿諸弟幼且有遺腹弟陞析產成婚曲盡友愛
閩客葉章遺金十斤貯囊坐埃還之客欲酬以半不受
陸宓朱志字子深撫州知府琳子性至孝歲禮捐私蓄佐公
產殖落質錢以施無倦色鄰有女強力者以計娶陞宓廬而
返著有捫心錄運甓餘抄

孫璧朱志字朝瑞博學不第以貢授江西吉水教諭陞伊府
教授致仕璧弟僉事璽貧時不能從師手標疑義就璧剖析
白首歡洽事寡姊五十餘年門外雙槐連理因自號一槐婦

翁王某無子籍其遺資以宗人之長者主其祀年九十三卒
林雨朱志字少巖僉事桂子值徐海亂產中落而性慷慨鄰
里藉以舉火弟病痰以產讓之從弟無歸者咸爲割產析居
以明經授溧水教諭遷代府教授子楚不求聞達亦能加惠
兄弟子諸負券悉燬之年九十四卒

馬汝賢朱志字印湖篤學好古領隆慶丁卯鄉薦早卒著有
印湖先生集以子明瑞贈工部員外明瑞有傳從姪孫啓賢
生員授徒多雋士洪學使承疇旌其德行

按朱志汝賢及其從姪啓賢皆附明瑞傳今於未登仕版
者概不附列傳改歸行詣後做此

沈宏光嘉興府劉志叅朱志字子懋號肖山嘉靖間以諸生遊雍徧交海內名士數試不第會父兩山病瘍輟業歸躬湯樂衣不解帶者數年值兵荒謹持門戶常痛不及事母見手澤必泣生平潛心理學兼精祿命苧衣櫻屨開席講論學者宗之晚悟天道元氣成于貞人心愛德歸于正作愛正編又嘗以三徭之弊作均平議立宗子法爲世稱述累贈翰林院脩撰子懋孝懋嘉懋孝有傳懋嘉字會真號白巖與兄齊名著四書說概白巖遺稿

馬千里程志字伯良廩膳生少博學雅慕高義歲饑請賑活人甚衆同庠有挂于理者力解救之季父珣無嗣迎以歸奉之終身課弟千乘不以家政煩之比弟貴事兄亦若嚴父居恒恬淡凝靜不慕聲利坐一室左右圖書怡然自樂名士往往出其門封太平知縣仲子維銘有傳

沈錡朱志字望洋慷慨有義節嘉靖甲辰乙巳間旱蝗隨父塚設糜賑饑全活甚衆子民範字寅所有醇行不以子萃楨貴改其素萃楨爲姦黨所構民範怡然曰小人所切齒者是君子我今得爲君子父矣萃楨有傳

陸珂程志叅朱志字子珍好義樂施宗族鄉黨有貧不能婚葬者周之輯格言勗子孫曰饒人一着讓人一步爲善最樂無欲常安卒年八十三兩舉鄉飲不赴子文典字希堯性孝

友折節讀書甲辰歲饑捐貲設粥以活流民爲張亨娶婦路拾遺金還其主以至讓塔基田捐葬地一一好行其德嘗手書清慎勤及仁廉公勤四箴訓其子長庚後珂與文典皆以長庚貴贈布政使長庚有傳

陸光宅程志字與中隆慶庚午舉人少慕陽明之學闢天心精舍集名士講究師門宗說性好施賑人阨困而自食脫粟衣布素臨歿書無極太極四字王龍谿曰與中之學以仁爲本而又徹禪宗故至性不亂云

劉麟程志叅朱志字子仁力學修行好施予三族賴以舉火者甚衆妾李氏父老無依厚遺遣歸以事其父以孫廷元貴

馬右都御史

胡濂朱志號碧源有隱德以孫士相贈江西右叅政子友忠事母孝年九十九歲一生不入公府亦以士相貴贈如父官士相有傳

馬珂程志叅朱志字世望少穎敏父官廣州幕解餉金舟次彭蠡爲逆藩所掠珂方迫試聞信卽手一襪行或勸以試畢泣曰試乃重於親耶會王文成守仁平逆藩諭知廣州銀尚存遂請牒訴之當事不得復走訴之京卒得白後以貢授南直六合訓導再遷連山教諭不赴著有諸史辨疑

過厚嘉興府袁志叅朱志髫年失父事母惟謹父產爲兄蕩

廢所遺不及什二厚更讓腴取瘠伯槐無後厚應嗣所受千金悉公之族人隣人妾死誣訟夜以百金壽乞居間峻却之及庭鞠力白其寃隣人感泣著有性理通鑑要略諸書子庭訓有傳

鮑應選朱志字太鹿湖州長興人博學洽聞治春秋得麻黃之傳執經問業戶屢常滿萬歷癸卯館于邑馮氏因家焉以明經入成均秉鐸松陽山陰俱著聲譽子季方之高之元文名赫然學者稱春秋三鮑

懷所學程志字敏卿性穎慧韶年補諸生臬使者詣學執經講使者大稱賞之謂其有經世之志中萬歷己卯舉人日惟扁戶讀書有以請託至者亦頰謝之經年不一至公府年三十一卒

俞志臯朱志字蓋卿母早亡父有足疾弱弟未成立志臯守一經資館穀供朝夕養中萬歷丁未進士謁選卒於潞河蕭寺聞者傷之

陸橋朱志字元建號石居深明性理詩文入宋人之室景賢祠創立義田多夾輔功著有石居集行世

陸從誥朱志字具評員外從論弟天啓辛酉舉人學業醇至能爲人師狷介不苟取與人咸稱之

陳增嘉興府袁志字進吾少英敏由廩生入太學有才名嘉

靖中副車不得志閉戶著書學宮燬倡義修建百日而事竣
凡邑中士大夫所捐助者皆還之華亭徐文貞階撰墓表
陸大柱朱志字平治光祿署正萬源子監生好義樂施課子
尤嚴

張熒朱志字恕齋監生母歿哀毀不支父病願減筭以延果
瘳世宗朝銓部楊豫孫薦之不赴惟以詩書自娛雲間張東
海契之孫明昌丁卯舉人復昌監生舉鄉飲賓

按張志熒與其祖濤合傳列義行門傳末云有子布政使
大忠云云誤考張氏家乘大忠係載道之子熒之姪孫應

訂正

沈維鏡程志字西野諸生父垣守惠州卒扶櫬歸賻遺槩不
受鬻產積書十餘棗手自評隲暮年辭貢不往著有霏玉漫

吟史漢鈔

時敏程志字恥負事父孝父歿苦枕塊哀毀有加踰三十

按本文踰三下脫去一十字府袁
志遂誤為嘗三喪妻今更正 喪妻下帷攻苦里人願以女女

之不應獨居四十五年室如懸磬卻金自守

馮伯禮嘉興府袁志參程志字節之號讓伯太僕卿敏功子

敏功卒一臬賻以金伯禮遵遺命歸之官築寶應護堤與其

妻查氏事母以孝聞性任俠嘗為友人授室傾囊不吝及卒

有束芻墓上會哭者生平好讀異書詩學劉長卿著有春秋

羅纂十二卷 載明史 藝文志 剩言一卷

按詩繫稱伯禮為貞孝誤考貞孝乃伯禮妻查氏私謚詳京山李維楨所撰墓志今從程志釐正

劉希聖朱志字思睿天性孝友母孫淑人病衣不解帶者三月兄弟五人析產時獨取其最下者嘗遊白下拾遺金於逆旅坐候其人還之以子廷元贈兵部尚書弟希賢字東溟性孝友事繼母盡禮進膳躬親有指使則身先婢僕人以為難

施應墳程志字士和少時代昆弟繇役建白平徭諸議嘗路拾遺金俟失者至還之贅曹曹富而無子貲應歸應墳及曹卒應墳視其含斂哭之去無少染指性喜施予不問家人生產課子極嚴以子鳳來贈大學士鳳來有傳

曹大有程志以孝友聞膺貢不樂謁選詩酒自恬子孔榮有傳

陸長春朱志字景陽長庚從兄性孝友以父文昭鰥居時集高年置酒會曰非此無以娛我親也嘗贈友人劉某兼金為其子娶婦後其子豪于貲且兄宦顯長春絕口不道前施萬歷丁亥大疫早起見五鬼竊語曰正人在我輩當避之家中竟無染者

陸啓鏐朱志字開雍兵部侍郎長庚子生廣德州署有雙竹

竝蓮之瑞性端重頓笑不苟為諸生足不入公府產中落勤于課子人以為賢子濬睿有傳曾孫凌勳監生能詩早卒姚舜宣朱志號華樓父應坡有純德司訓定海視諸生如子弟舜宣以萬歷初恩貢為仙居教諭家居奉庭訓昆弟友愛邑令王若惺敬之數造廬乞教終無私請孫之鳳字叔瞻為諸生有名著四書粹言尚書定解積勞成瘵卒

陸文相朱志字春臺諸生父賓橋坐累論戍繫獄數年文相七歲見知縣出攀輿呼救知縣問知書否以能破對因命扇為題應口輒就遂釋賓橋賓橋亦有隱德嘗拾遺金十兩坐候其人還之孫懷玉有傳

按原文作知縣丁士美士美係嘉靖己未狀元邑職官並無其人

馬香朱志幼失怙恃刻苦自立兩兄老迎養殯葬撫四姪如已子子鳴雷鳴霆各有傳

陸萬達嘉興府袁志字天相撫州知府琳孫諸生親歿同弟萬達廬墓輪瞻弟姪孤寡更捐貲置產以佐婚嫁喪葬之用所著有文端集綱目子史纂程志萬達字負劬諸生幼穎敏為詩文倚馬可待從徐魯源遊研究心性之學學使洪承疇亟稱之神光兩朝實錄列諸孝友傳所著有文惠集諸書

陸燭朱志字時秉邑生父相建昌府經歷宸濠將變先乞歸燭性至孝父病刺指血投藥中尋愈遭喪廬墓三年臨逝張目捉筆書曰從古英雄有去時只求心不愧天知無一語及

家事子懋功有傳

馬維鉉朱志字鼎甫隨父九衢於孫簡肅家塾曲承父志簡肅字之曰體衢廩餼館穀一無所私課弟維銘成進士撫孤甥陸瑞徵爲之婚娶舉妻姪潘某三喪萬歷庚子以貢授廣東保昌訓導太守委以橋稅維鉉力辭不任沒于署贈刑部郎中子德灃德澍孫嘉植德澍字商雨扶父喪歸里哀感路人性坦厚子嘉植旣貴自奉不異寒士徒步里門有司造謁皆拒不納共推爲長者累贈吏科給事中德灃嘉植各有傳

柘上遺詩丙申元旦德澍忽緘一冊付諸子曰至秋當開及歿啓封視之其詞類前知者有未刻稿一卷

郭日乾程志叅朱志字懋學孝子球子生員嘗客長安友人

萬境死道上負之歸邸學使蘇濬旌曰尚義真儒著有青蒲草元經史叅同諸書以子紹儀贈御史紹儀有傳

懋學朱志性孝友敦族誼倡立祭田能以一經教子子又機孫上瀾各有傳

倪承裕嘉興府吳志叅朱志明湖廣叅政輔曾孫性孝友讓產代運糧家殖盡落讀書每搜取古人與義著性理箋旨子秉元籥元秉元崇正庚午舉人好義急公有父風籥元有傳倪維城朱志字北鑰邑生少贅于陸與妻弟長庚同課誦相砥礪如嚴師蘆瀝場總爲小竈累維城與趙志奎等上書鹽使者陳利弊事甚悉年九十賦落花詩一章而卒子鍾瑞孫

淑則有傳

陸大銳程志字恒甫江西巡撫萬垓長子萬垓先任滇南大
 銳以道遠請侍不獲屢書勸歸萬垓授積俸百餘金令置田
 為娛老計越六載歸大銳仍以原金進萬垓怪之跪呈奩產
 曰藉此足贍何更置為為人謙冲折節不與戶外事里中人
 忘其為貴公子也弟大鏌字宏甫官鴻臚選舉志作年十三
 隨父之任舟覆洞庭牽衣救父冒入重淵會有天幸偕出當
 萬垓撫江右時大鏌家居心動亟馳省母果沉疴泣禱於神
 請以身代得甦生平純白不存機械至貧而仕不改其操
 趙科張志字南泉歲貢生崇正壬午歲大禳捐粟煮賑邑令

旌之

按舊志歲貢內無此人惟例貢有趙邦科存以俟攷

曹繹祖嘉興府吳志叅張志字之采諸生崇禎辛巳大饑出
 粟三百石以賑子五長穎洙字系宣天啓丁卯舉人性耿介
 足跡不履公庭官永豐教諭次穎泗字仲宣崇禎壬午舉人
 輕財好義鼎革後捐金贖族衆羈繫者以好義稱姪孫元案
 監生亦有品行

俞文溢張志字以忠諸生沉潛篤學動必以禮意所不可輒

義形于色生平寡交以道義相切劘者終身無間性孝友撫

教庶弟倍至屢試不售以歲選入京卒于邸

陸溶原嘉興府吳志字嗣安少為諸生負經濟才崇正末伯

兄清原死節遂無意人世結廬墓所不入城市手抄二十一
 史節本雅好客聞足音蹙然輒喜年七十六宗祠構難痛哭
 沮之不能曰我不幸猶生憂憤疾作勺飲不入口半月卒
 過銘盤朱志字伯新府丞廷訓長子崇正庚午副榜才名重
 公卿間庚辰歲饑米價踊貴建平糶議邑紳及富家感動價
 遂平貧民全活邑有利弊侃侃正言無顧忌年七十九卒
 沈瑞盤朱志字德載號三楚析產時以腴田讓弟自取磽确
 由諸生入太學不第歸舟次維揚聞弟瑞鑾訃倍道抵家憑
 棺慟絕未幾鬱鬱成疾卒著有太易廣義子原浹字永叔性
 倜儻遇事敢言以子菜貴 封知縣菜有傳

馬文治張志叅柘上遺詩字遠之丁巳文游京師三十年葉

文忠嘗疏薦之不果用歸家杜門當事以賢良徵不赴乙酉

沒於難 按程志選舉作官光祿寺署丞

俞煜朱志字君三崇禎丙子舉人幼失怙哀毀盡禮承祖父

歡備至弟光翰蚤世恤發字孤無少怠生平不涉戶外事惟

以圖書自娛尤精青烏家言著有叢神考義

楊兆梧朱志字非棘號蓉城崇禎己卯舉人幼孤性至孝哀

慕不忘嘗為文禱于忠肅祠冀沾一命揚其親既登賢書謁

見房考鄔期仲詢及世闕大哭失聲一座動容有師儉堂稿

贈清豐知縣子燦有傳

平湖縣志 卷九
倪士顯朱志字慶雲貧而好義助表甥楊大成婚娶代鄰人
陳甲償鬻身值許東鰲夫婦老無所依生養死葬之子虬有
傳

沈紹閻朱志字巽仲崇禎己卯歲貢葺宗祠廣墓田皆躬爲
之

胡嗣璜嘉興府吳志字映日從父士相平白蓮賊叅謀晝晚
歲隱居北郊爲野人衣冠著墨龕詩集子偉字松侶庠生居
父母喪哀毀滅性友愛其弟不忍分居嘗捐金免陳某鬻妻
債性學輯明稗三十卷

劉亮采朱志字德儼兵部尚書廷元子監生走京師代父申
雪當事見阻鬱鬱成病而卒人稱其孝崇禎六年學宮圯亮
采捐千金爲倡邑人義之

金台拱朱志字星候真定知府汝礪子邑生性孝友母疾危
割指血和藥得瘳弟岳貧困有田四十餘畝代爲輸糧終身
不易

薛仲猷朱志推官振猷弟性孝友讓遺產捐彭蚠漶田五畝
作漏澤園

沈日晃朱志字以大湖廣布政使萃楨子少爲諸生壬午後
絕意進取嚴于課子其三子太學生麟字雍南工於詩文公
卿雅重歿後聲名益著云

陸標錫朱志叅三魚堂文集一名元字叔因性寬和生平未嘗有疾言遽色與人交坦直無城府遇事輒慷慨族女有蒙難者歛貲贖之順治間士子沿明季舊習互相標榜標錫嘗語其子隴其曰居官不入黨秀才不入社便有一半身分又嘗云貪與酷皆居官大戒然貪而酷人皆知惡之若自恃廉謹而刻以繩人人慕其風節競相倣效禍不可言矣居嘗教子弟必令篤實務本其子隴其卒成大儒以隴其貴贈靈壽知縣隴其有傳

張甫浙江通志叅樵李詩繫字伯宣庠生文名大著後閉戶讀書不求仕進輯族譜創宗祠置祭田爲闔族倡生平樂善好施壽九十無疾而卒子兆治字枚璧亦庠生工詩文有粵遊藁懷十諸詩

陸本朱志纂字天全弱冠爲諸生侍父肇淳疾衣不解帶父歿哀毀盡禮撫幼弟弱妹成立奉母色養備至數奇不偶以長子光旭封御史光旭有傳次子光耀貢生官景寧教諭施傑朱志松江同知洪烈祖也安貧樂道子大義亦敦孝友爲鄉里善人洪烈有傳

嚴嘗張志叅樵李詩繫字次良少年能文連江知縣劉希夔奇其才以女字之父客死遺產悉讓諸昆奉母盡孝未幾卒

平江縣志 卷九 人物中
以子思位贈翰林院檢討思位有傳

張著朱志字形先諸生英敏夙成齟齬時蚤負大志甲申後棄舉子業避跡甬東王季重秦汝翼譚元孩皆尊禮焉晚愛逃禪并究老莊及陰符經參同契悟真篇諸書生平不苟不吐惟種德藝善哀窮賑乏爲無厭年七十五而終子周鼎家漢周鼎字耳黃性溫慈沈潛好學康熙乙卯舉鄉薦第四大司寇魏象樞器重之家漢有傳

胡右寅朱志字伯時博學有文名丹黃盈案寒暑不輟事母孝母有不豫色長跪移晷老而不敢怠嘗以邑乘多闕畧參校綜核自訂一集藏於家

陸瀟原朱志叅嘉興府志明江西提學副使錫明嗣子性孝友事嗣母吳本生母沈備極孝養本生所授居宅義讓兒姪孫輝吉字兆枚邑諸生孝友以文行稱

張孚吉朱志字初缶號依山邑生爲文古奧歷試高等年僅三十忽棄制業構研聖學以明心見性爲實功悟太極一元大哉乾元至哉坤元得三元混合之妙理持躬端整儕輩皆莊事之微言密義不輕示人

陸濬原深原朱志皆明兵部員外澄原弟濬原字嗣哲少負才學交遊日廣甲申抗疏爲兄澄原訟寃下獄論者直之乃釋深原字嗣長性不昵俗後謝舉子業以書籍文章自娛終

有覆硯齋集

陸若采朱志字亮虞都御史清原子性孝友痛父殉節終身未嘗笑飲族叔祖鑿有夙負不能償采割已產代為解紛聞者義之

沈中琛張志纂字獻臣吉水知縣中柱弟少讀書砥行與兄齊名後從劉宗周黃道周遊學問益進詩思曠遠翛然多出塵想有抱一軒吟稿

施湛朱志纂字露巖明大學士鳳來曾孫少敏悟十三歲為諸生作文有原委得蘇子長筆力工吟咏早逝有草堂初集金璞玉張志字柳城貢生與兄式玉俱有異稟讀書一目十

數行下工詩賦博涉典故有以疑義詢者條析無倦容嘗客江南縣幕以文字見知制府延入署相得甚歡越二日制府以憂去其數奇如此生平著述甚富俱不傳

金尚源朱志字梅格邑生進士式玉弟式玉既歿產中落公私內外尚源悉身任之不以累諸昆性敏慧博通性理音律歷數之學

楊嗣源嘉興府吳志字若谷增廣生工制藝屢薦不售著據梧詩鈔撫松文集敦倫勵行年八十九卒

周心峻張志纂字介于居圓泖濱淳修厚德樂善好施鄉里咸推善人云

平海縣志 卷九
按張志 傳有云心峻見陸清獻資敏囑弟永瞻攜至武塘讀書又云當時理學蠱亂獨永瞻世守程朱故清獻小學時趨向克端云云縣志糾繆謂果爾清獻必不忘德宜有頌述今考諸編會無片語及心峻是欲藉清獻以成心峻之名而不知道誣心峻以失清獻之實也今爲更正並存其說

沈中秀朱志字穎生鄉介賓崇正庚辰歲大饑佃高某逋租三十餘石鬻其婦以償中秀惻然捐之夫婦得復聚

王應中朱志字鐘甫明末僉充北白解戶謁新令朱如容令詢利弊應中條陳詳悉令心識之遣家難賴以得白

吳光室朱志字季宜宋進士俯後寓于湖因家焉姪孫宗道僅三齡撫之十五年婚畢而返其橐廣製良藥普施病者又集古人格言刊修福正詮一書陳繼儒爲之序晚號虛白年七十卒

倪象鴻張志字芽始諸生博學工文社集中推執牛耳善養生家言得大壽人以爲調息之驗康熙壬子知縣陳孚宸聘修邑志同修者陸禾諸人禾字非莢遺著今無考

顧天健張志績學攻苦著有四書一貫講行世子麒錫有傳陸徵誠朱志字心葵少孤事母孝母病衣不解帶浣衣滌器必躬親之家鮮立錐而狷介有守嫡姪之淵無子徵誠主議

嗣有覬覦者嘗以金駭而却走硯田自給對弟子不苟言笑雖盛暑爍金未嘗去冠幘手輯先正格言若干卷

顧明傑朱志字越萬號漁山庠生母病割股煎藥得蘇家產中析不分彼此凡人龍欲赴試傾貲助之好學工詩著有漁山子集祖可達父大宗皆孝友稱世德云

沈日芳朱志字元贊府庠生幼喪父事母吳氏晨夕不離左右非應試定省無間

邵朗朱志字元亮康節先生後幼好學壯而多病謝舉子業旁通二氏家本寒素好周人急受其子封二十年足不至公府邑令執年家子禮請見固辭道遙物外口不言阿堵遇家

慶人請服公服朗曰君恩不可瀆也壽七十諸子欲徵詩文以佐觴笑曰我豈須此此安足爲我重弗許不衫不履時與衲子往還蕭然高寄以子延齡 封中書延齡有傳

金京望浙江通志字達菴父燈以善行聞於鄉京望讀書入成均有友無力營葬割贈腴產爲兆域鬻宮兩次修葺皆捐貲倡率祖居瀨水行者梗于途獨建石梁二遠近便之以子南鎮貴 贈陝西鹽驛道

盧聖瞻張志字上史歲貢生以孝友淹博見稱督學許身獎其孝友子錫爵字兼有院試招覆以名同學使者祖諱令易之執不可遂黜以布衣終

平海縣志 卷九
楊聲佩張志字雲瞻庠生幼敏慧受業曹志周讀書砥行色
養二親杜門課子屢躋棘闈卒長子標庶吉士繼子翊時知
縣皆有傳仲子益齡字心川凝字肅廷俱有文行

馮文麟高志叅張志字茂芳拔貢生淹貫經史艱于一第遂
絕意仕進績學砥行嚴課子孫子元白字冠中有文名孫幾
字孟三從事舉子業試輒冠軍司衡屢徵閱卷雍正癸卯拔
貢年踰六十矣乾隆丁卯舉飲賓以子廣譽贈知縣

王允猷當湖人文逸字二嘉諸生明季兵燹時驚不輟絃誦
初豐于財家瀕海之獨山海氛闌入劫掠一空遂爲貧士益
肆力于古晨炊不繼泊如也性方嚴不苟言笑雖黨塾中輕

儼子遇之亦震讟卒年六十一

顧人龍嘉興府吳志字雲馭少穎悟讀書工制義以歲貢授
太平訓導教士有程嘗吮父疽賴以愈弟在縲縲破產營救
得釋與人交藹如春風年九十五世一堂赴鄉飲大賓卒子
涵字眉峰庠生承歡友愛亦以壽終

陸若禾嘉興府吳志字元祈號訥安諸生父御史清原按閩
若禾秉家政悉體父志傾資以應及父殉難哭覓遺骸且被
外侮心力俱瘁生平尤精史學年七十一卒

曹鳴灼高志叅張志字臻萊由諸生貢成均爲人重本行見
善惟恐不及與陸清獻交最契博通墳典并精地理年九十

舉鄉飲大賓子宗柱有傳張志纂孫煥謀增廣生陸清獻外
孫沈潛力學歲饑棄產捐賑亦能讀清獻書觀風使者王國
棟以賢良方正薦以母老辭不赴

沈嶠嘉興府吳志字松亭性孝友九歲祖桂禎垂歿戒之曰
我遭族黨毀不得葬父旁汝識之嶠日夜冀成祖志族衆鑿
其誠遂得耐葬嶠每掃墓悲哭不已家極貧歲禮寧凍餓一

介不取張志嶠精鐵筆善製硯湖中稱為嶠硯與宗人璜善彼此相勗教其子

黼熊輩先器識而後文藝一邑稱之

吳光遠高志字邇修幼敦孝弟嗜古文詞下筆千言立就谷
學使應泰拔置冠軍早歿弟廷遠字覲宣性仁厚犯而不校

合邑稱長者

何元璜張志字嶽高四歲失恃事繼母能得父歡父歿老
祖母竭力承志敦行以古人自期遭喪不作佛事性嚴毅瞻
視儼然不苟言笑以諸生終無子著述甚富不自收拾其書
多散失不傳

鮑文揮張志字明宇歙縣人遊北雍屢試不售徙家當湖歲
春秋必旋歙躬親祭掃志尚恬雅博通經史書法尤得二王
遺意子三懋昌懋暹懋昂皆博學好古克紹父風

程伯鐫浙江通志叅嘉興府吳志字遷于家貧負米供親父
歿哀毀喘息幾不續母喪亦如之兄為寇掠伯鐫訪求止存

一姪相恃慟哭營救歸爲之完娶庶弟二人遭兵流落亦親往覓歸伴有家室歲時周恤之事庶母如母後家漸饒扶植族黨親知不倦

屈希完嘉興府吳志字天若少喪父事母孝撫弟友愛手營父祖葬死冰雪中復甦與子朝陞俱以諸生有名孫應麟垂髫入泮工詩文書法早夭

陸其燧浙江通志參張志字晚春年十六爲庠生旋貢成均仲弟早世撫遺孤以祖遺宅讓之割腴田爲婦翁沈扶民卜葬親朋以緩急告者立應潘紫翰早卒乏嗣其燧任殯葬并舉其家未舉喪康熙戊子歲饑施粥報本塔院全活無算以

仲子鳳岐 贈州同知鳳岐字武山好施予捐社穀六百石當事獎其惠孚桑梓以子黃鉞 贈知府

倪兆嘉張志字允康一字豫菴性至孝淡于進取有姊旣嫁而貧兆嘉爲育其男女婚娶如已出父母先後歿盡禮極哀遇親朋急難不惜傾囊以贈新安洪姓者貿布失業負兆嘉三百餘金不責償子三覲光有傳載光敦倫樂善綽有父風用光增廣生力學早世

馮洪復嘉興府吳志諸生工舉業兼古文辭居家孝友宗族咸推重之姪願字君可亦敦節行克盡孝友舉鄉飲賓

馮洪行嘉興府吳志字士用幼失怙恃居喪骨立春秋祭享

哀慕事長兄如父有所爲必稟命時以王褒姜肱比之
顧蛟嘉興府吳志字飛淵性孝友事親先意承志兄弟四人
析產時蛟獨取礲礪嘗買舟舟內拾遺金若干中路轉還其主
周日芳嘉興府吳志字蘭生監生慷慨有膽識康熙初奉檄
丈量日芳條議弓口照舊又陳白糧改析之弊得徵本色其
他好義事不可枚舉

按是時知縣倪适另改弓口日芳說不果行

陶有生張志字西音諸生性孝友舉鄉飲介賓好施與設粥
賑饑子傑亦樂善好施有父風

馮耀嵩嘉興府吳志字周贊諸生有聲庠序尤篤于友愛凡
喪葬大事獨以身任

戈定張志字長發庠生加意嫺睦親族無告者膳之無歸者
殯之夏帳冬衣解贈不吝戈溪北置義冢數畝

孫培嘉嘉興府吳志字孚吉庠生旋遊太學崑山徐相國爲
司成屢見賞試輒冠軍孝事本生父嗣父喪葬盡禮不欲私
嗣產以周親黨貧乏人咸義之

趙廷棻張志字我師廩膳生少孤事母孝友愛姊弟竭蹶婚
嫁頭白無間言廷棻長身玉立負雋才善騎射通音律雅工
談論其文章沉浸濃郁晚歸平澹課徒端嚴有法

趙廷驥張志字丹陛諸生讀書別有心解不落凡近旁通術

數家貧授徒自給年近九旬猶搦管運思以毅力角勝兼工楷書草隸

馮焞嘉興府吳志字瑞駢庠生性肫篤曲盡孝道與人接謙抑自下一切名利澹然鄉里推古君子妻李氏早喪終身不再娶親黨義之

陸斌嘉興府吳志字柴菴考授縣尹性孝謹誠篤撫幼弟如子著有廉湖散稿

馬嘉棟高志字礎臣生員抵礪廉隅里黨矜式以子焞贈邱縣知縣焞有傳

盧開顯張志字備人讀書敦行終困塲屋以子生甫贈知州生甫有傳

陸士煊嘉興府吳志字礪三幼有至性痛母氏早歿終身不赴讌會作詩酷似孟東野石曼卿旣而謂詩僅小技有志者不爲遂肆力於經書有大易輯注三禮疑義月令辨等書爲士林所重

馬金章張志字堅城諸生日記千言一二過輒不忘風神如衛叔寶然性端重不苟言笑博涉騷雅凡有未析典有未覈者書識于壁必洞曉乃去之弟鏊字擎三好以古文爲時文一掃比耦纖軟習徑中年得痰疾項背擁腫講誦弗倦以歲貢終

徐銘張志字常吉以諸生入成均性孝友父病籲天請代及卒哀慟不欲生以母在強起眼有淚竭廬墓終身家事一稟于兄庭無間言後因喪母哀毀過甚遂卒次子宗泰字成高附貢生精風鑑醫理廣施藥餌樂善不倦

馬燦曾高志字用光歲貢生選開化訓導事親曲盡孝養弟爓曾貧病艱嗣燦曾友愛最篤長子佐堯字靜先丙子副榜父母沒年已七十哀毀同孺募捐田輯先世兆域創祭掃規儀任龍泉教諭督諸生以白鹿規條旣毫賦遂初焉

阮亮采高志字道躬諸生父洵徵應鄉試卒于途亮采年十二號泣扶柩見者垂涕事寡母盡孝祖庠生鑒喜周急亮采克成厥志捐金以息族之爭產并完娶不能婚者撫孤姪女與己子均分其田宅子廷鳳府學生早卒長孫藻垣雍正乙卯舉人

曹與枚張志字宸卜少年力學康熙癸酉舉人淡泊自甘年三十五未及授官卒

李登嘉興府吳志字安道康熙癸酉舉人性孝友門內無間言讀書深明性命之學舉子業其緒餘也弟瑤枝字耕烟雲裁字文海俱以文名時有三鳳之目登上公車卒于京邸士林惜之

倪蒞林高志字幼貞監生州同知銜篤學勵行父淑則受業

清獻詰林篤學勵行奉清獻爲師嘗校訂清獻大全小學諸書鏤板行世東湖水勢湍急陸楊橋尤爲西南要衝捐資千餘金改建石梁行旅至今賴之

張長明高志字朗辰庠生嘗設義塾訓其鄉之子弟近村有渡往來者病涉長明甃石爲橋行旅便之歲饑煮粥濟人賑活二千餘戶卒年七十六

陸爓昌嘉興府吳志字赤城性至孝父知縣瑤林暮年里居爓昌先意承志克敦友愛親族貧者不待告急周之生長貴胄無裙屐氣弱冠知名屢試棘闈不利以經史百家自娛授松陽訓導不就卒

陸世琪張志纂字元芳諸生工詩自號清虛散人子文元字虞音監生以詩世其家學訓其外孫沈初有成後初貴 贈文元禮部侍郎世琪從子德鑑字睿韜亦工詩

陸秉琰高志字方崔父溶原貢生母周氏吳江相國女秉琰幼育于周補吳江弟子員屢試不遇慨然有四方志初從族兄祚蕃登萊道幕晚寓山西之清源更名琰字玉峰有終焉之志次子時煨遠涉數千里長跪泣請康熙辛丑始歸生平廉而好義座右惟圖書數卷卒年八十六

林朝珪張志字天漢九歲能屬文十一歲試卽冠軍入府庠年踰壯矣阨于闡戰爲人方巖峻整落落寡合性嗜古邑中

推博雅領袖及門多知名士陸解元士琰其一也無子遺稿散佚

陸名世高志字松友庠生敦厚有古風年三十婦歿屏婢媵終身不再娶卒年八十二子瑩字端明廩膳生恂恂儒雅無疾言遽色早失恃慟不欲生事父先意承志怡怡色養數十年如一日人稱孝子卒年六十孫養正字聖修諸生年十九倡戒淫會偕同志于月朔設冊書名注明無犯焚文昌神座前隨課文二首名敦行集砥行澄潔卒年三十三

馮壇張志字研登康熙丁酉舉人少失怙事母至孝家貧授徒以供甘旨操行潔白持躬嚴整足跡不至公府與同榜蔣拭之爲文字交稱莫逆年六十二卒無嗣

楊豫源張志字升恒諸生幼失怙事母孝母病刲股以療中年喪耦不再娶弟巨源字以潮諸生性孝友營葬父母及世父皆盡禮故人陸聖修沒教養其孤俾成立程白川卒京邸時分束脩恤其家巨源子敬直字義方居父喪哀毀卒

沈源湟張志字殿榮鄉飲賓鍾蕃季子少失恃事父至孝兄喪耦資兄續娶者再恤戚族之嫠孤子嘉梅字裕芳監生父傷足每扶抱如廁後患中風扶掖起卧不怠敦行善事葺橋梁掩枯骼倡平糶償逋糧助兩世未葬者子廷烜登仕版諄諄以清勤愛民爲訓壽七十八

陸大復王孫高志皆知縣偉林孫大復字松澗貢生著有明
人世說春雨山房集王孫字視濤監生亦能詩大復子銘一
字恕先乙卯舉人官壽昌教諭銘三監生嗣王孫後

張漢年張志纂字蒼亭號客槎監生候選通判慷慨尚義時
築海寧塘向九峯採石漢年急至省謁柳叅將進忠曰乍浦
九山不但保障一邑實嘉禾之扞衛也石不可去柳爲請於
撫軍遂得免漢年爲閣學陸萊外孫嘗卽閣學丙舍改築亭
榭題曰水西雲塢一時名士雲集詩酒唱酬比之北海云
屠肇臨張志字臨宜爲諸生試輒冠軍膺戊寅選拔除太平
教諭端士習嚴月課三載乞休歸年七十有八猶授經他宅

問字者屢滿戶外病亟戒子孫治喪不得用僧道口授常耕
硯田熟莫還書債清二語者再而歿

馬煊曾張志字又昕號懌齋幼失怙哀毀逾成人長益勤學
砥行工制舉業耽吟咏一時名士酬和成編性灑脫喜成人

美兄焯入北闈無資煊曾有田十五畝盡鬻以助焯得領順
天鄉薦成進士煊曾舌耕自給堂兄紹曾歷官戶部侍郎煊

曾不因人熱晚號味閒老人壽九十一子遂堂字子深有操
尚入太學因二親垂白色養終身壽亦登九十孫恒錫有傳

楊九雲高志字廣菴廩膳生幼孤事母孝積學能文吳下諸
名士爭重之遊其門者率年少登科第生平相切劘者鍾石

城胡國期有國秀集遜業堂論行世其未刻者有四書心解詩古文時文稿評點古今文讀本

徐鈺張志纂字寶籙號芥園兄弟八人友愛無間撫季弟鐘成立好行善事不求人知年五十始中雍正己酉鄉試生平讀書期心得實踐躬行人有急周之無吝色有鬻女者詢知家世焚其券卽令攜歸設家塾督課子弟尤以品行相策勵以子鴻昇貴 贈知縣

按各傳中有因子孫 封贈者其子孫雖現存例得附名舊志并附生傳于例殊乖茲于現存者皆不復登後仿此

楊紹裘張志字翼王性孝友誠樸尚志節持躬端毅寡言笑不苟取與淹貫經史邃于宋儒理訓試輒冠軍以貢終著有易義管窺性理闡義諸書未梓子楷字貢九諸生攻苦力學以孝友稱

朱汝謐張志字晉三父鑠以孝友稱讀書砥行汝謐承庭訓敦本睦族族姪爲父覓葬地不得卽以已所卜吉壤予之乾隆甲子舉鄉飲賓年八十四卒子和字介堂乾隆戊午舉人乙丑中明通榜丁父艱歸哀毀卒於喪次

顧遐齡張志字符嵩監生雍正壬子歲饑傾已囊助賑饘粥路經水洞口拾遺金俸其人來還之子兆颺乾隆乙酉副榜屠楷張志字幹園幼失怙事母純孝母有不豫卽長跪以請

必得親歡心始即安撫諸弟妹拮据婚嫁雖傾囊不恡

孫文海張志字叔沛監生弟觀海早世撫其孤設家塾教戚

族中無力從師者凡育嬰濬河建橋成樂輸助

倪淳張志字東岩正直端方不苟嘗笑制藝一準先民為諸

生館陶氏適陶被猾搆訟詞連淳時值雍正壬子秋試默誓

一生名節獲售則洗榜發果捷

陳統源張志字見山力學砥行雍正壬子歲祲捐佃租窮民

感戴盧生甫卒于官為之經紀喪葬課子義方以孫嗣龍貴

贈翰林院侍讀

孫均嘉興府吳志諸生少負博雅名文章詩畫時稱三絕

周理嘉興府吳志字建庸監生本姓李嘗遊京師歸而聚徒

講學著有頤貞集

陳永祺張志字體仁廩膳生性寬厚和平喜怒不形于色每

談前輩懿行娓娓終日聽者動容課徒首先器識戒後進浮

佻飭躬砥行士林矩範少清敏專精舉業工楷書年六十不

售學使者檄試將告休學使曰汝尚矍鑠可畢試竟列高等

乃益踴躍赴棘闈年七十餘卒以孫朗貴 贈撫州知府

張志纂乾隆戊午永祺出闈夢中有告以汝庚辰發解者醒語友

云子庚辰年已百歲是教子不必試也自後輟舉子業飲酒

自娛不復赴試後庚辰 恩科孫朗領鄉薦第

一已丑進士官比部郎中終江西撫州府知府 沈昌祚嘉興府吳志字御帆諸生負才名為毛檢討奇齡高

弟性曠逸與宗人拓西黑蝶輩倡酬間作小賦得六朝遺意
沈黼熊張志字肅度增廣生淹貫古學下筆爲文手不停綴
尤工填詞晚歲自號老著菴主弟敏修字巽來少績學工文
中年悼亡不再娶家貧授徒于孤寒力學者倍加訓課不取
束修生平行誼爲士林圭臬

孫從謹志字質生廩膳生工舉業以熊鍾陵爲楷模一時
名士咸推祭酒書畫亦工妙

馬拱垣高志字翼乾諸生親歿終身茹素戚族以緩急告曲
應其求曰何可令有愧色嗜學不倦著有尚書集粹年七
十五不出山者四十餘年

沈修齡高志字遐菴一字葦鄉庠生工詩古文詞尤長詩餘
極爲陸太史奎勳所推重修清溪家譜立言有體遠近講宗
法者取則焉家故饒以落拓好施予至饘粥不給恬然安之
陸其暉高志字琢良廩膳生孝友醇謹授徒講學以讀書立
品爲訓尤究心經學著周易講意八卷

褚王庭張志字扶九博學工文自西江學幕歸文益高雋終
困棘闈雍正乙巳以廩貢授孝豐訓導年踰大耋不樂赴引
老力辭子如幾孫鳳階如幾字陟三庠生試輒前列至食餼
年已近七十矣幼治毛詩閱六寒暑弗輟晚耽易旁搜博採
丹墨互換稿本如綴古帖鳳階字冠周府學生先卒

徐凝張志字鞏藩監生為父躍林肖像建祠做古刻木事親
 意家素封藏書數千卷耄期猶研究弗輟歲稔設粥以療民
 饑捐金倡修學宮子上法字乾菴雍正癸卯舉人著有徐南
 浦時文以孫維垣贈福寧知府

朱兆鵬張志纂字萊峰歲貢生事親孝友愛兄弟數十年如
 一日居喪不作佛事與人交禮讓不衰中年妻沒不再娶故
 交程白川卒于京邸百計歸其櫬子尚襁褓撫之成立家貧
 取予必嚴手訂先儒緒言數十卷皆蠅頭細楷為文章以大
 氣卷舒書得米南宮筆意教授生徒門下士極盛侍郎沈初
 其弟子也子堯佐字襄哉廩膳生耿介拔俗有古高士風
 按

鵬以史姓遊庠
 故張志從史

馮堪張志字景曾監生早失怙事母施氏盡孝母暮年患頭
 風疾十餘年不離牀褥堪衣不解帶侍奉湯藥寒暑無間母
 歿盡禮盡哀為人誠厚端謹族之貧者調卹不怠雖拮据弗
 顧遇侮不較羣推長者年七十八卒子四長錕有傳次鑄諸
 生事父尤謹愛養備至

屈大成張志字集齋貢生候選州同知少孤事母承顏順志
 兄弟式好無間言家素封克崇儉約與人謙恭和煦雖童稚
 微賤未嘗以傲忽加之延名師訓子弟家道嚴整門館無雜
 賓與弟天成以行義相勗樂善好施若捐葺黌宮等事咸踴

躍爲之卒年七十七以子學海貴 封大理寺評事

沈發張志字慎齋庠生父元洲字宗環有詩名工書早卒發生纔十月稍長母親授章句每讀父書卽泣然流涕事母先意承志母歿茹素三年入闈俛得俛失者屢甲子已入殼復遭斥落遂絕意功名授徒課子家貧盡鬻婦奩產葬三喪及諸父窀穸戚族告急雖空乏必周之自奉儉約不苟取與以第三子初貴 封禮部侍郎卒年八十二

馬鎧張志字應旂遭父喪哀毀幾滅性服闋遊庠與弟鏞馳驟文壇人稱二馬鎧領壬子鄉薦丙辰禮闈不售得疾歿于旅次鏞竭力謀歸櫬葬先塋旁事寡嫂甚謹撫姪女婚嫁如已出食貧苦志終其身

陸載周張志字存六世楷孫奇勲幼子出嗣叔父霽勲遺產爲他族浸蝕載周怡然不以介意因出所有爲先人治葬迎養生母甘旨盡歡合葬本生父母五喪爲諸姪姪女經理婚嫁好周人急凡宗姻貧乏孤嫠無告者竭力扶助交游以緩急告應之無吝色至性誠懇克敦古道

沈鼎張志字王才少孤性孝奉母不離左右弱冠母卒寢苦枕山三年不櫛沐積受濕氣瘡發髮半脫落生平不殺生喜解推常調卹隣里之屯蹟事叔父肅甚謹叔貧割產以奉年三十四卒

張應壽張志字玉溪增廣生嗣伯父御蒼事所嗣母定省無
虛日賑族弟貧乏復祖墓域獨任辦糧一十六畝精堪與術
不計酬直里黨推長者

沈璵張志字辛公歲貢生歷試優等年逾五十居喪哀毀盡
禮痛兩世未葬拮据營窀穸友愛昆弟撫孤姪成立中年悼
亡不再娶卒年八十五弟廣字萊洲庠生性孝友事繼祖母
繼母竭力承歡與兄同居一室課徒自給造就生徒多成名
雋遇戚黨有事以道相勗一言排解鄉里尤賴之

陸鏞張志字宮聲庠生生平孝友言行篤實胸無柴棘與人
交和藹可親不見愠色與韓廷芳馮朝棟等創舉同善會鏞
力爲經理日漸充廓工詩文兼擅八法年四十六

沈廷牧張志字岳儕庠生幼孤事母至孝家貧積館資營葬
兩世又葬外父母居鄉正直自持族黨咸敬而畏之譜田祭
產竭力維持得以不墜

周璣張志字在庭讀書好善有穿窬入室察其迫饑寒啟囊
以贈其人亦改行子錫龍有傳

倪觀光張志字又文號咫菴性謙和敦厚與人接益然如春
設帳于家問字者踵門至多所造就雍正癸卯拔貢除於潛
教諭八年砥礪研摩諸生悉感其教士習蒸然平生孝友姻
睦每調親族之貧乏者年踰八十終

陳鼎鎔張志字幼陶諸生思挾肘後方濟世遂以醫名族叔
及孤子鼎銘無所依鼎鎔割半宅與居撫如已子鼎銘得讀
書入學鼎銘字敬三能詩及于紹興旅次

賈三登張志纂字庸堃號蒼崖少孤力學家貧就椽史性誠
樸不苟言笑雍正己酉選授安徽涇江巡檢芟除陋規刻苦
勵節民有訟開誠勸化未嘗用杖笞特嚴保甲令盜賊屏迹
有賈舶遭風覆江千貲萬計設法護歸衛軍與民爭蘆地訟
歷久不決爲根究原委片言鞫服他如請平糶立社倉添防
汛編軍籍免攀役凡有關民瘼者條之上官無所忌上官以
其位卑敢言亦曲意從之調權蕪關不以脂膏自潤民皆愛

戴去之日號送數十里涇舊有狄梁公廟民設三登主祀于
其廡歸里後親知不能婚葬者常典衣仗助年七十七終

翁維正張志字寧文幼醇篤博通典故尤研貫性理語類諸
書工文章試輒冠曹以歲貢除長興訓導嚴月課慎程校端
坐明倫堂與諸生晰疑辨難日以爲常學田久爲豪右佔踞
維正牒訴上官盡復其田悉以歲入頒寒儒多士戴之

鄭時乘張志字起田監生性耿介不欺然諾尤好施予同善
會公費有缺輒出已資墊給事成不索償亦不居功又嘗做
袁了凡遺意設功過格以自檢乾隆壬辰學使王杰給敦行
不怠額以獎之

何大齡張志纂字鼎揆鄉飲介賓賦穀季子候選州同知讀書砥行樂善好施捐祭田供祀族姓無力讀書給膏火費戚黨不能婚葬者助之嘗買林姓田後林親歿無厝地焚券還其田歲暮躬詣閭巷視貧甚者投以銀錢卽去并遍給獄囚其他善行甚多嗣子巽廷鑽孫濟皆能承先志廷鑽尤克盡孝養大齡沒哀毀過甚後二旬亦卒遺命以衰經斂戚里稱之

陳嘉績張志纂字丕文監生幼敦孝行父歿旅館家貧嘉績授徒積貲扶櫬歸經營窀穸不使兄弟分任其事事嫠母孝母疽發于背吮其毒得痊伯兄早世撫其女爲之擇配士族弟嘉德以友朋事牽連繫獄追銀一千八百兩嘉績倉皇拮据鬻已產完納之後嘉德歿又撫其孤成立

胡沆張志字兩瞻諸生幼失怙恃育于舅氏家至性孝友嘗憾不能侍奉二親遇春秋節哀感備至兄本澁歿資硯田營葬恪事寡嫂撫諸姪如己出恩義兼至經理婚嫁貧不能自存者留養之生平敦氣誼樂施與不輕然諾作省身箴自警年八十五預知逝期沐浴更衣卒

金昌緒張志字廕臺由監生任福建布政使都事清操自勵無以供朝夕泊如也性好施凡友戚至閩必招人署款洽爲之經紀往往傾囊以贈終無倦容喜爲詩跌宕不羈無子乞

休歸卒

丁廷鑒張志字浩如諸生幼從祖母居魏塘陳寔萬家下帷發憤殫研經史爲文章磊落有奇氣陳有僕婦奔廷鑒寢室力拒之後歸里家奇貧視田所入悉供甘脆性狷介不苟取與遇後進諄諄以力學爲訓

楊萬基張志字御青以歲貢任縉雲訓導釐定祭品復朱文公祠田署雲和教諭整飭士習卒于官

鮑振宗張志字玉齋號南鷗庠生幼敦孝義性倜儻不羣工詩文兼擅書法家貧授徒自給雍正壬子癸丑間歲大祲振宗謁邑令條陳便民事十令從其半前後經理育嬰堂創立

規條弊修墮舉嬰糧漸充邑令高國楹延修邑志郡守李清時復邀纂禾郡古蹟毫不私干中年鼓盆不更娶

黃密張志纂字公謹居邑之乍浦研窮經術尤精于禮嘗歎近世三年喪無復有行其實者早喪父母逢忌日必素衣冠涕泣終日妻歿被服飲食一遵杖期制人或迂之不顧也與其弟白首相友愛無間言乍五方雜處習尚浮夸密以矜飭矯厲末俗人品巋然爲士林圭臬生平尤工書精韻學

潘宗敬張志字誠孚諸生幼孤事母孝家貧館于外寤寐中時呼母淚痕積枕席性端方厚重見義勇爲墓田失守傾家產贖歸爲業師沈營葬兩喪績學工文無嗣

劉遐齡張志字伯朝號晚香少失怙母馮氏守貞十餘年口授遐齡章句母故號慟不欲生嘗捐資倡復宗祠賑恤姻族有鬻婢者詢知舊族焚券歸其女不索值聞者義之

張廷誦張志字穆如號詩佳諸生博通經史贍文詞試必高等入敷文書院肄業以五經應試屢困棘闈晚年居鄉課子足不入城市生平敦崇實行師嚴錫光故遺孫金紱孤苦無依育于家飲食督課如已子及入邑庠并爲婚娶割宅與居金紱歿撫恤其孀至易簣時猶諄諄囑子若孫善視之子宗濂字茂溪廩生師洛字淳夫諸生俱敦行能文惜早卒

何廷鏞張志字東江例貢生至性孝友通達事理雍正戊申同邑陸培知東流縣以廷鏞人品卓犖才具敏練特薦引

見命往陝西試用廷鏞因親老不願遠宦力辭旋里偕諸弟問安視膳承歡膝下

屈維銘張志字竹書監生父病割股以療遂瘥修學宮濬城河並捐資以助卒年八十三

施燦張志字履元廩膳生性孝父母病劇醫藥不治燦割股和藥以進俱瘳壽皆八十外生平慷慨尚義賑恤嫠孤晚年經營葬事拮据成勞卒

孫國柱張志字顏卓監生性灑脫不設城府家世小康樂推解有以緩急告者無不應遂中落工吟咏含蓄有蘊致顧不

自愛惜隨作隨棄子鏡明為收拾殘詩然存亦寥寥矣

孫栢曾張志字永青諸生事所嗣父如本生父待羣從兄弟

如同懷性剛毅不肯媵阿諛俗善楷書工詩精制義易筆時

戒家人勿作佛事惟製絮衣百領惠無衣者

按編次前後科第易于挨列今行詣一門從各志併入凡

封翁則視其子之科第為次貴介子則視其父之科第為

次至諸生無可考者年代既久約畧雜序稍有舛錯或不

免云

方技

按垂弓和矢一技成名皆足千古邑李甲以畫見賞東坡甲亦能詩過澤充詩古文詞不敵其書法之工前志皆以入方技從其重也今于工書畫及精醫學卜筮堪輿者列為方技門

宋

李甲橋李詩繫字景元居華亭鄉自號華亭逸人善填詞工

小令有聞於時畫翎毛有意外趣海岳外史嘗稱之東坡題

其畫曰郭恕先之後一人而已嘗畫竹於嘉興景德院東坡

過之題詩曰聞說神仙郭恕先醉中狂筆勢瀾翻百年寥落

何人在只有華亭李景元甲亦有和詩曰翠葉彤竿已占先

湘雲千疊勢爭翻野夫不識天人面知是虞皇第幾元晁無咎題

李甲畫鵲詩上林花妥逐鶯飛愁絕江南雪裡時嗷暗何須

傍簷喜稚穉相對兩寒枝畫雁詩網羅無限稻梁肥憐爾冥

冥亦庶幾戲鴨眠鳧滿中汀衡陽無意更南飛畫鵲詩急風吹雪滿汀洲近臘淮南憶舊遊小鴨枯荷野艇冷去年今日

人物中

魯之茂圖繪寶鑑字梅海號雪村畫梅竹寧宗朝仕為郎
趙孟淳嘉興府柳志字子貞子固之弟繼秀安僖王後自號
竹所墨竹可觀

周堯敏嘉興府柳志參圖繪寶鑑字禹卿號學山畫竹酷似
文湖州嘗繪陳山海市圖武塘周鼎題曰有城嵌山觀其海
勢身欲浮動

王鼎海鹽圖經字德新好寫竹學丁子卿深悟筆意子泰之
號竹趣亦能紹父業

明

陸鑾朱志字克和七歲能詩歌廣州知府沈琮見而奇之以
其弟御史肆女妻焉成化間以善書徵授鴻臚寺序班五奉
使皆稱旨

朱端曾和程志端字克正後所人正德間以畫士直仁智殿
授指揮俸賜一樵圖書遂號一樵畫宗馬遠呂紀居京師甚
為時所重和乍浦所人亦以畫士直仁智殿筆法甚高惜早
歿九山志二人少時貧甚業樵漁時天妃宮未建名一片石
端嘗于石上或沙上作白描勢忽一日于山間遇一異人問
曰汝欲作畫耶吾授汝筆和亦跪而乞亦出一筆嚙其頰以
授忽不見後兩人用筆隨意皆殊絕

按朱端後無繼者曾和後有曾軒轅少攻舉子業棄去學

平海縣志 卷九
醫兼善河洛理數既工畫李天植輯九山志屬畫九峯圖
稱其天機磅礴登作者之堂云

孫官書畫譜字德懋嘉靖時人能爲古文辭楷法甚道勁大
字亦雄俊有神采

林鳳華書畫譜字子夏號丹壺居士萬歷時人精楷法在右
軍大令間

按以上二人舊志皆失載今遵

御定書畫譜補入

魯烈程志字懷陽文謚十世孫少好學尤愛讀太元遂取元
而揲以三得戒之七次戒其疾損其卹仰天曰古人所謂不

爲宰相則爲良醫元其以贊告乎後浮沉諸生以貢授澧州
博士每於講業外劇譚長桑君術起人膏盲多奇中百餘歲
卒

姚井程志精於醫理尤工針灸活人甚衆戚里不能婚葬輒
捐貲助之晚歲家稍落然好施不倦

陳龔朱志正嘉間人讀書慕古不遇以琴自娛遂擅其勝因
自號友琴嘗攜黃色古琴遇山水佳勝處輒於膝間撫弄意
致軒然

馮太衍程志字素元羅山知縣煦子煦善醫大衍能世其業
陸金程志字雲峯精岐黃術濟人立效自華亭徙湖每旦啓

戶病者鱗集次其入門先後以爲切脉序子二道光道充道
光號明暘精幼科一兒食果多病脹氣急取桂麝瑞香三味
爲丸一服立愈衆醫問之道光曰獨不聞果得麝則落木得
桂則枯瑞香爲百花妒乎一兒染奇症四肢堅不可屈道光
曰此非藥可療舉傘覆之繞牀焚安息四圍設爐焚沉檀兒
卽平復少間又發隨屑沉香飲之而瘳道充號實暘諸生亦
精醫人稱二難有陸氏金鏡錄行世道光子從論道充子從
誥有傳

唐守元程志號吾春瑣溪人贅於陸因傳其業一婦人偶食
羊甫入口聞呼遽吞而應逾月病發舉家莫測婦亦忘之淹

及兩年守元曰此必胸有宿物家人曰兩年不食安得宿物
曰試以我藥投之旣而大吐痰塊中裹羊肉一臠也疾遂愈
張以純素患角弓反張曰此名痙症一劑而復袁化祝氏兒
患痘遍身血逆無罅守元搗藥塗其身滲藥鋪衲褥上捲起
倒豎牀前合家啼駭叱曰若輩弗啼此名蛇殼痘氣必用逆
乃得脫已而皮膚解裂如蛇蛻然新帶顧氏男痘後目瞽守
元曰惜我見之晚當先開一目俟三年後可俱復明果驗著
有醫鑑醫林繩墨後金鏡錄

吳悅程志字三峯少讀書明敏遘危疾遂精岐黃術爲東南
名醫徵爲太醫院使在京邸全活甚衆熹宗三賜金幣

徐桂庵朱志以字行華亭人善養生僑居當湖以刀圭活人子光瑞孫如璧光瑞字樂庵少攻制藝精易理累試不售乃出桂庵遺書讀之所治多神驗與沈司業懋孝為世交如璧亦能傳其業

按朱志桂庵入方技張志改列寓賢今仍從朱志

張軫嘉興府袁志字漢聚精痘疹率以意為治多奇驗所至兒童竹馬迎之性好施親舊賴其資助

陸堯化朱志字和卿以讀書得羸疾遂放懷山水几案閒布置益景做名家筆意尤工于琴所著琵琶行白頭吟蘭亭秋興答蘇武書別恨二賦凡百餘譜皆矜慎不傳

徐同亨朱志字介如性沉靜工制義不遇書法得董文敏之神人莫能辨然不輕與人書傳者絕少

俞恩燠朱志字二酉諸生負才尚俠書法酷似董文敏文敏欲致之笑曰予肯作董氏客耶不赴有五如逸稿

馬德澄朱志字若水童年膂力絕人善騎射精篆刻書畫諸藝家貧落魄自號雪林山樵著有摩尼集

計治安朱志字明長貢生為文古雋善書工山水然不輕應人心計聰敏于奇門遁甲諸書獨窺其要

國朝

過澤充朱志叅柘上遺詩字涵輝號滄谷府丞庭訓孫紫髯

偉軀落拓自放家貧徙居村落徒步往來馮秉恭嘗戲之曰
公一歲中滇黔萬里矣工詩古文辭尤善書嗜酒草聖師右
軍大令行楷得顏平原神骨請書者必置飲酒半援毫揮酒
便面側理縱橫几案或作大書淋漓四壁醉後偶不當意輒
狂呼罵座更喜談謔詞辨風生身後親故讌集曰今夕使髯
在不虞寂寞矣後竟貧死于西林僧舍卒之前一日題壁云
世中煩熱愛薛少府之神遊波底清涼了莊漆園之大夢遺
稿散落惟存棠谿倡和諸作

沈信嘉興府吳志字驚濤諸生好擊劍工草書甲申後棄舉
子業築舍城南顏曰借園示寓形字內之旨著贈言集借園

詩鈔

沈禧昌朱志字上錫邑生善書兼工蘭竹有逸致

戈中顏朱志字右度工篆書精印章爲時所稱

胡右宏朱志叅張志字仲袁少餽于庠攻制藝與兄右寅齊
名善書畫篆刻皆有神韻

陸二龍朱志字伯驥少習春秋舉子業後舍去從武林秦心
卿遊精于墨妙合北苑石門而化之尺幅懸壁間烟雲滃然
題跋皆信手揮寫自然入雅

張培朱志字抱一諸生有文譽性澹泊中年無子遂以醫自
顯精痘疹雖貧苦者不避風雨趨視也善寫山水時攜好友

往來天目笠澤間自號畫禪疾革前悉取平生名畫書籍古玩器名諸好友分贈之罄橐中金散諸蘭若翛然而逝

張坦朱志字怡度工翰墨從雲間沈士充遊盡得其法而細入過之有幽風桃源諸圖爲時所珍子篆亦工花鳥

枕松年朱志字季申工山水篆刻圖章皆自鑄古紐每製一方人輒攫之去

韓鏐朱志字劔光邑生家有池亭日與酒人墨客徜徉嘯歌能詩善山水法梅道人

吳龍章朱志字雲蒸髫年好學精堪輿術父母早逝遺弟麟章未週歲撫育婚娶皆龍章力也妻賈氏中年卒誓不再娶

陸森立張志字中卿號嵩石監生明湖廣按察使鏊孫長身好讀書工寫山水吟不甚富而清婉有致卒年三十九子琰卓字蘊崑亦高尚能詩工書遷嘉興

胡湄嘉興府吳志叅張志字飛濤號晚山諸生初就傅便學作畫師弗能禁也樵李項氏書畫最富湄故項外孫因恣觀摹倣點渲蟲魚花鳥時稱仙筆性耿介貴人以金帛乞畫多拒之題款故作離奇勢曰恐人亂我真耳孫璞字振齋能世家學

沈學鏊張志字元望幼孤耿介自喜不因人熱能識秦漢字擅鐵筆遊雲間吳門爭授館餐衍聖公孔廣燊見其所作介

友人貽書招之謝不赴特索印譜去為之敘村居訓蒙自號負暄老人陸奎勳題學鑿印譜詩雲篆龍文寫不如誰云鐵筆技之餘山橋古致雪漁秀定要胸中萬卷書

楊泰基張志字瞻岳號海農皴法宗馬遠蒼古儻淡都用禿筆尤工指頭畫

曹銘張志字功壽號嚴菴庠生少工畫倩人書款人厭之因棄畫專習八法遂以能書名

錢珍張志字遇章善水墨花鳥落筆生動得天然意趣

朱軾張志字棠蔭諸生工詩文書畫得米襄陽董華亭筆意陳紹發張志字筠亭庠生工八法得屋漏痕折釵股遺意戒

石碑其筆蹟也

金應泰張志字元音善大小楷書有鐵畫銀鈎之妙與陳紹發齊名

陸如金張志纂字其相庠生性謹厚與楊之淳交之淳亟稱其人工詩文尤擅八法數十年求書者接踵幾有鐵門限之目

僑寓 按方志有僑寓門以紀名賢勝蹟為鄉里增光邑姚桐壽寓廣陳著書垂後其後名賢寄迹亦不乏人惟異地移居而子孫世為湖人者則分入各門

元

陸子榮 舊志從外氏作朱姓朱志生於元英宗至治元年世居海鹽得

先儒理學之傳不樂仕進教授生徒所著有樂菴類稿明初

平海縣志 卷九
嚴講學聚徒之禁徙居當湖鎮隱焉子敬字直齋亦以理學著聞號漸達居士

姚桐壽樵李詩繫叅張志字樂年桐廬人博學多才識元末為餘干教授與僚友海鹽沈穀善結姻盟穀死桐壽攜子就婚值世亂遂寓居豐山之陽與楊廉夫貝廷臣潘澤民張子晦楊友直遊後卜居廣陳鎮顏所居曰樂郊著有樂郊私語

一卷

入四庫全書

明

葉臻朱志洪武初居平湖以任俠聞好施與三傳至廷柱以功曹仕為廉吏執法甦冤獄與太守廷抗免官曾孫繼美官

給事中徙居嘉善

姚士莖浙江通志叅朱志字叔祥海鹽人與胡震亨同里同學以與博相尚蒐討秦漢以來遺文秘簡撰秘冊彙函若干卷跋尾各為考據具有原委又嘗同輯海鹽圖經時稱博雅馮祭酒夢禎校刻南北諸史俱出其手後復為沈司馬思孝記室與邑人陸澄原友善嘗往來其家吟咏最多兵興後窮餓以死著有見只編蒙吉堂稿

璩之璞朱志字君瑕南直華亭人少負奇氣善屬文應童子試江陵何學使置第二之璞曰我固不當冠軍耶遂棄去放情詩酒年三十餘遊董文敏其昌陳徵君繼儒之門工山水

醉後揮灑趣致天然未嘗越于規矩文敏見而歎曰君取乃能爾耶五百年後必有識者與邑中陸光宙友善每當初秋

徂暑以紫薑青豆置一野航浮遊三泖間終其身陸光宙贈之璞詩君

瑕負奇氣才藝真絕倫天地總睥睨悠悠何足論胸次富邱壑落筆生風雲誰能賦鸚鵡令人羨爾衡

按書畫譜之璞上海人與志傳異

葉紹袁朱志叅嘉興府吳志字仲韶自稱天寥道人南直吳

江人天啟乙丑進士歷任工部監盛甲廠時值軍興製刀劍

炮火等器極精備帝覽而悅之旋去官乙酉後避兵平邑居

馮氏耘廬未幾歸卒著有欄塵集子燮字星期康熙庚戌進

士嘉善籍中式任江南寶應知縣以詩文名于時有已哇詩

文集原詩內外篇

朱志紹袁室沈宜修字宛君女純純小鸞皆能詩

魯得之朱志叅嘉興府吳志字孔孫錢塘人天啟崇正間來

遊嘉禾居當湖最久性樸素不求榮利好學敦行爲李太僕

日華入室弟子工寫竹兼歐顏書法董文敏其昌陳徵君繼

儒重其才品方之吳仲圭其題竹詩有願得人人操大節不

虛衰朽寫琅玕之句亦足見其志節矣晚年右腕病乃用左

腕作書畫益飛動倍常日華暨子肇亨嘗有墨君題語二卷

皆題其所畫竹也著有竹史細香居集未刊

李延昱曝書亭集叅張志初名彥貞字我生一字期叔後改

今名字辰山江南上海人寓邑之佑聖宮三十年少負逸才

以經世自命善談論熟于舊家典故及諸瑣碎事不得志乃
 隱于醫受業於季父中梓士材有延之治疾者數百里必往
 視疾愈不責報或酬以金卽買書積至四五十櫃旣寓湖坐
 卧一樓花香茶熟瀟灑自得四方遊士至必置酒贈貽接歡
 而去晚年黃冠草履自稱道者先後生子九人皆天遂無嗣
 張志作二子誤年七十疾革適秀水朱彝尊至湖乃出所著南吳舊
 話錄暨放鵬亭詩古文集屬之并以所儲書二千五百卷畀
 焉其餘平居玩好一瓢一笠一琴一硯悉分贈友朋越二日
 而卒遺命弟子用浮屠法盛尸于龕焚其骨瘞之塔今葬在
 東湖濱刊有藥品化義醫學口訣脈訣彙辨痘疹全書行世

國朝

萬六吉嘉興府吳志字新孺江西南城人落落不與俗交深
 得性命旨經書多所纂述甲申後棄家客遊徜徉山谷間往
 往無定跡康熙壬寅至禾郡後寓當湖遇舊識留館于化城
 菴卒殯菴後

韓畱朱志字經正號石耕順天大興人高僻孤潔能詩善鼓
 琴爲世絕調當酒酣耳熱輒拂袖作霹靂引直使山雲怒飛
 海水起立嘗自言欲學一曲必奉千金以是遂無傳者終身
 不娶遍遊諸關塞晚年僑居越中康熙間復寓當湖有天樵

集張志畱旣卒有閩僧成忍不遠數
 千里來求傳其琴知已死哭而去

會晚柘上遺詩字庭聞江西寧都人客秦之寧夏衛以商籍中甲午鄉試性冪兀負奇氣足跡幾遍天下初入浙與秀水

陳莢朱志作交最善康熙甲寅間關中孫元伯守備乍浦摯

家口依之一日入郡偕莢訪沈椒衍于東村椒衍素以俠聞

而隱者也入見張目問漢書數則椒衍哂且條答之顧謂莢

曰此豈特魯朱家耶卽點鬼簿爾我勿若也其誕率類如此

居二載徙寓通州卒于旅舍

葉舒崇朱志字元禮江南吳江人寄籍平湖年十三補弟子

員爲人英敏博雅美丰儀望之如神仙中人入北雍名噪都

下中康熙乙卯順天鄉試丙辰成進士選中書舍人戊午舉

博學鴻詞科未試卒嘗注庾子山哀江南賦幾脫稿病發有

謝叅詞二卷

許箕高志叅張志字巢友號龐菴海寧人性孤介寓秀水時

梅里周箕好結客而箕閉戶獨吟嘗戲語箕曰與爲熱周寧

爲冷許旣遊當湖交諸名士其留別詩云解將劍挂徐君樹

不學袍憐范叔寒書法秀勁乞之無吝色著有抱膝軒詩按

李詩繫作捫膝軒詩

栢古樵李詩繫叅高志字斯民號雪耘居近嘉善白牛村因

自稱白牛村人寓湖最久能詩善書議論所至信口而談晚

年益自放揖耕牛曰是不素餐者或塗脂粉爲婦人裝曰非

此不諧俗甚而佯死驗友人之哭與否鄉人拊掌呼為栢癡
 而不知其意有所託也後喪婦及子女乃笑曰此天之將成
 我志矣遂徧訪匡廬天都林屋諸勝欲往而不返焉未幾卒
 于湖著雪耘詩集行世

翁歷樵李詩繫叅張志字紀長號逸伶自稱蟄園叟江南華
 亭人少負才名孤僻傲睨不合于俗後遷邑中與沈季友為

忘年交詩牌酒盞殆無虛日文有逸氣論詩尊唐闢宋惜遺

稿散佚無傳

沈季友懷逸伶詩當代今誰屬雄文有此人客身飄泊甚天意思才類王氏談元塵陶家漉酒

巾高風如可問我亦欲垂綸

翁嵩年浙江通志叅小石林文外字康飴號蘿軒仁和人少

以文章名東南康熙戊子進士授戶部主事歷刑部郎中督

學廣東矢心慎恪先是學使者以瓊州在海外檄生童附雷

州考試嵩年曰吾豈以一人易千萬人命乎出入忠信何畏

焉竟渡海後著為令分校禮闈大學士張廷玉刑部尚書勵

廷儀皆出其門既歸甲午秋卜居東湖得沈氏園栽花種竹

築室數椽顏曰村南烟舍每遇花晨月夕與湖中詩老觴詠

留連有村南烟舍詩年八十二卒所著天香書屋稿白雲山

房集友石居集行世

海寧查慎行再過當湖喜晤翁蘿軒詩無事能相憶扁舟雨詣門秋田經夏曠

冬日就春温身健長如此官貧且勿論別中安慰意各喜得

會孫又寄祝翁蘿軒八秩壽詩杖朝一老重鄉評耳尚含聰
 目鏡明獨樂湖山歸地主同時卿相是門生烟霞愛赴神仙
 畫絲竹閉陶觴咏情我欲壽翁何以祝祝翁還請借翁名

王廷燦高志字孝先號似齋錢塘人康熙辛酉舉人出湯文正斌門歷任江南崇明吳縣知縣所至多政聲致仕歸橐無餘貲挈家居當湖之陸氏園時翁學使嵩年亦寓湖往來倡和有似齋詩存子延年字介眉博學洽聞中雍正丙午鄉試官至翰林院侍讀與邑人馬璠錫馮鈿張雲錦相倡和有東湖移居詩一卷

翁元發張志字繹弓慈溪人遊學來湖遂爲邑諸生試輒冠軍文譽翕然及門多知名士陸檢討奎勲其一也屢蹶場屋僅以明經歸老于慈歿年九十五

蔣振鷺張志字子羽嘉善人祖姑母嫁清溪沈氏自幼往來

湖中遂入籍寡言笑博通羣籍詩文俱工敏兼精八法與高編修輿陸檢討奎勲以文章行誼相砥礪雍正甲辰進士選庶吉士授編修庚戌春給假歸里與邑令郜煜善賦詩論文外不干以私有富人訶知使君貴客橐金求先容堅謝勿許時人服其清德

黃厚燧張志參乍浦志字復光號千頃居士松江府學增廣生隨兄徙乍浦性嗜學竟日不釋卷以工書名波磔古雅有魏晉人風格著禹貢尋原又有書貫書權書殼數篇發明六書蘊無子年六十一暴疾卒

顧原張志字虎承號松仙會稽人工詩畫別開生面不盡規

撫古人畫竟卽題詩其上終老子湖

